

ጳውሎስ ጊሞቲዮሳስ ፃፊዳ ኮይሮ ኪታ ጋሳ ቆፋ

ጊሞቲዮሳ ጌቴቲያ፥ አማኒያ ናዓቴሳይ፥ ጉሳ ኢሲያን ዮሌቲስ (ሃ.አ 16:1-3)። ኢያ አያ አይሁዴ፤ ኢያ አዋይ ቃሲ ጊሪኬ አሲ። ኢ ጳውሎሳራ ኢሲፌ ኦሴይሳኔ ዎንጌላ አሶን ጳውሎሳ ማታን ማዲያ አሲ። ጳውሎስ ጊሞቲዮሳስ ፃፊዳ ኮይሮ ኪታይ ሄዥ አይፌ ቆፋታ ሚንሲ ያሌስ።

ኡባፌ ኮይሮቲዲ ኪታይ፥ ዎሳ ኬሳን ዴንዲዳ ዎርዶ ቲሚርቲያባ ሚንሲዲ አዴስ። ሃ ኢማሳ ቲሚርቲይ አይሁዴ ቲሚርቲያፌ ባጋ፥ ቃሲ አይሁዴ ጊዶና አሳ ቲሚርቲያፌ ባጋ አይኪስ። ሄሲካ፥ «ሃ ቤንቲያ አላሜይ ናጋራን ኢቲዳ ጊሾ አሲ አቶቴሳ ዴማናው ዱማ ጊዲዳ ፀራ ኤራናው፥ ኢሲ ኢሲ ካሳታ ሞና አጋናውኔ ማቾ ኤኮና ዎይኮ አዚና ጌሎና አጋናው ኮሼስ» ያጊያ ቆፋ ባሶ አሲዲ ዴንዲስ።

ናምግንሎ ቆፋይ፥ ዎሳ ኬሳ አይሶባኔ ጎይኖ ዎጋባ ታማርሲያ ቲሚርቲያ፥ ሄሳዳካ ዎሳ ኬሳ ካሌሴይሳቲኔ ኤንታ ማዴይሳቲ አይ ሜላ ማራ ዱሱ ዳናው ቤሲያኮ አዴስ።

ወርሴሳን፥ ጊሞቲዮሲ ዮሱስ ኪሪስቶሳስ አሲያ ሎዎ አሲ ዋኒዲ ጊዳናው ቤሲያኮ፥ ቃሲ ዱማ ዱማ አማኒያ አሳ ማታን ኢያው ዴዲያ አዋቴሳይ አይቤኮ፥ ጳውሎስ ኢያ ዞሪዳ ዞሪያ ዴሞስ።

1 ጊሞቲዮሳ ኪታ አይፌ ቆፋታ

ጌሎ ቆፋ 1:1-2

ዎሳ ኬሲ አይሲያ አሳስ ኢሜቲዳ አይሶ ዎጋ 1:3-3:16

ጊሞቲዮሳስ ኢሜቲዳ ቲሚርቲያ 4:1-6:21

1 ኑና አሺያ ያሳኒኔ ኑ ኡፋይሳን ናጊያ ዮሱስ ኪሪስቶሳን ኪቴቲዳ፥ ዮሱስ ኪሪስቶሳ ሃዋሬ ጊዲዳ፥ ጳውሎሳ፤ 2 አማናን ታው ቴማ ናዓ ጊዲዳ ጊሞቲዮሳስ።

ዎሳ ኑ አዋ፥ ኑ ጎዳ ኪሪስቶሳ አዶ ኬሃቴሳይ፥ ማሮቴሳይኔ ሳሮቴሳይ ኔው ጊዶ።

ዎርዶ ቲሚርቲያፌ ናጌቴሲ

3 ታኒ ማቆዶኒያ ባሺ ኔና ሃዳሪዳይሳዳ፥ ኢሲ ኢሲ አሳቲ ዎርዶ ቲሚርቲያ ታማርሴይሳ ዲጋናው ኔ ኤፌሶናን ጋምግና ሜላ

ኮያይስ።⁴ ኤንቲ ጎጫ ባይና ሃይሴ አዳኔ ባንታ ኮቻ ታይቡዋ አጋናዳ አዳ። ሄሳ ሜላባይ ፓላማ ካሌሴሴፔ አቲን አማኖን አሴቲያ ያሳ አሱዋስ ማዴና።⁵ ሃ ኪታ ሁጫ ቆፋይ ጌሻ ዋዛናፔ። ሎዎ ካሃፔኔ ቱማ አማኑዋፔ ቤንቲያ ሲቁዋ ዴንሴላናሳ።⁶ ኢሲ ኢሲ አሳቲ ሃይሳ አጊዲ፤ ፓሶና አዳኮ ሲሚዶሶና።⁷ ኤንቲ ያሳ ሂጊያ አስታማሬ ጊዳናው ኮዮሶና። ሺን ኤንቲ አይ አዲያኮ ዎይኮ ቱማ አሲዲ አዴይሲ ኢ አይቤኮ ኤሮኮና።

⁸ አሲ ቤሴይሳዳ ሂጊያን ጎጫቲኮ ሂጊይ ሎዎ ጊዴይሳ ኤሮስ።
⁹ ኢሲባ አኬካናው ኮሼስ። ሂጊይ ሎዎ አሳስ ሜዴቲቤና። ሺን ሂጊይ፤ ሂጊ ሜንሴይሳታ፤ ዎራንቮታ፤ ያሴ ያዮናይሳታ፤ ሼምፖ ዎዴይሳታ፤ ናጋራንቾታ፤ ጌሻቴሲ ባይናይሳታ፤ ቱናታ፤ ሃሪ አቶሺን ባንታ አዩው ዎይኮ አዋ ዎዴይሳታ፤¹⁰ ላሚይሳታ፤ አዴይ አዴራ ላይማቴይሳታ፤ አሴ ባይዜይሳታ፤ ዎርዳንቾታ፤ ዎርዶን ጫቄይሳታ፤ ዎይኮ ቱማ ቲሚርቲያራ ጋሄቶና አይ አሶ አሴይሳታ ሴራናው ኬዩስ።¹¹ ሄ ቲሚርቲይ ቦንቾኔ አንጄቲዳ ያሳይ ታኒ አዋጃና ሜላ ታው ሃዳራ ኢሚዳ ዎንጌላ ጊዶን ዴዔስ።

ያሳ ማሮቴላስ ጳውሎሲ ጋላቲዳ ጋላታ

¹² ታኒ አሲያ አሱዋን ታው ዎልቃ ኢሚዳ ኑ ጎዳ ኪሪስቶስ ዩሱሳ ጋላታይስ። ታና ባ አሱዋስ ሹሚዲ ሄ አሱዋስ ቤሳሳ ጊዲ ታይቤዳ ጊሾ ኢያ ጋላታይስ።¹³ ታኒ ሃይሳፌ ካሴ ኢያ ጫዩይሳ፤ ኢያ ዩዴሴይሳኔ ሜቶሴይሳ ጊዲኮካ ታኒ ሄሳ ኤሮናኔ አማኖና አሲዳ ጊሾ ያሳይ ታና ማሪስ።¹⁴ ኑ ጎዳይ ባ አዶ ኬሃቴላ ታ ቦላ ጉሲዲ፤ ሄ አዶ ኬሃቴላራ አማኖኔ ሲቆ ኪሪስቶስ ዩሱሳ ባጋራ ታው ኢሚስ።

¹⁵ «ኪሪስቶስ ዩሱሲ ናጋራንቾታ አሻናው ሃ አላሚያ ዩስ» ጊያ ቃላይ አማንሴይሳኔ አሳ ኡባይ ኤካናው ቤሴይሳ። ኡባፌ አዲዳ ናጋራንቾይ ታና።¹⁶ ሺን ሜሪና ዴዑዋ ኤካናው ኢያ አማኒያ አሳስ ታኒ ሌሚሶ ጊዳና ሜላ ዩሱስ ኪሪስቶሲ ዳሮ ዳንዳዒስ። ታው ኡባፌ አዲዳ ናጋራንቾዋስ ያሳይ ባ ማርታ ዳርሲስ።¹⁷ አይፌን ቤንቶናይሳስ፤ ኢሲ ያሳስ፤ ሃይቆናይሳስ፤ ሜሪና ካዉዋስ፤ ሜሪናፔ ሜሪና ጋካናው ጋላታይኔ ቦንቾይ ጊዶ። አሚንዲ።

¹⁸ ዊሞቲዮሳ፤ ታ ናዓው፤ ካሴ ኔባ ናቤቲ አዲዳ ቃላ ቦላ ኤቃዳ ሃ ኪታ ሃዳራ ኔው ኢማይስ። ኔ ሄ ቃላ ካሊኮ ሎዎ አላ አሌታና።¹⁹ አማኖይኔ ሎዎ ካሂ ኔው ዴዎ። ኢሶቲ ኢሶቲ ካሃ ዳዩዲ ማርካቤይ ሆቤን ዳዩይሳዳ ባንታ አማኑዋ ዳይሲዶሶና።²⁰ ሄሳ ሃኒዳይሳታ ጊዶን ሄሜኔዮሲኔ ኢስኪንዲሬይ ዴዎሶና።

1:13 ሃ.አ 8:3፤ 9:4-5

ኤንቲ ታማሪዲ ያሳ ጫዩይሳ አጋና ሜላ ታኒ ዓላሄስ ኤንታና አሳ ኢሚስ።

2

ዎሳባኔ ጎይኖባ

¹ ኡባፌ ሲንሳታዳ፣ አሳ ኡባስ ያሳ አይቻናው፣ ዎሳናው፣ ጋናታናው፤ ጋላታናው ቤሴይሳ ታኒ ኔና አኬኪሳይስ። ² ኑኒ ቱማ አያና ዴዎኒኔ ጌሻቴሳን ያሳ ጎይኒሼ ሳሮቴሳኒኔ ዎፑ ጊዳ ዴዎን ዳና ሜላ ካዎታሲኔ ሹማታ ኡባስ ዎሲቴ። ³ ሄሳ ሜላ ዎሳይ ኑና አሺያ ያሳ ሲንሳን ሎዎኔ ኡፋይሲያባ። ⁴ ያሳይ አሲ ኡባይ አታናዳኔ ቱማ ኤራናዳ ኮዩስ። ⁵ ኢሲ ዎሲ ዴዔስ። ያሳፌኔ አሳፔ ጊዶን ጊዲዲ ሲጌሲያ ኢሶይ ዴዔስ፤ ኢካ አሴ ጊዲዳ ኪሪስቶስ ዩሱሳ። ⁶ ኢ አሳ ኡባ ዎዛናው ባና አሲ ኢሚስ። ያሳይ ባ ዎዲያን አሳ ኡባ ዎዛናው ኮዩይሳ ቤሲያ ማርካይ ሃይሳ። ⁷ ያሳይ ታና ዎንጊላስ አስታማሬኔ ሃዋሬ አሲዲ ዶሪዳይ ሄሳሳ። ታኒ ቱማ አዳይስ፤ ዎርዶቲኬ፤ አማኖኔ ቱማ አይሁዴ ጊዶና አሳስ ማርካታና ሜላ ያሳይ ታና ሹሚስ።

⁸ ሄሳ ጊሾ፣ ኡባ ቤሳን ዴዒያ አዴቲ፣ ባንታና ያሳስ ዱማዩዲ፣ ሃንቆኔ ፓላማ ዲጊዲ፣ ባንታ ኩሺያ ፑዴ ዴንሲዲ ያሳ ዎሳና ሜላ ኮያይስ።

⁹ ሄሳዳ ማጫሳይ ባንታና ሃሪዳይሳ ቆንጨሲያ፣ ቦንቾይኔ ማሪ ዴዒያ ማዑዋ ማዓናው ቤሴስ። ኤንቲ ማሪ ባይና ሁዔ ዳሳን፣ ዎርቃን ዎይኮ ኢንቆን፣ ዎይኮ አልዎ አፊላን ባንታና አሌቂሶ።

¹⁰ ሺን ያሳስ ጎይናይስ ጊያ ማጫሳይ ባንታው ቤሴይሳዳ ሎዎባ አሶና።

¹¹ ማጫሲ ኪቴቴሳን ሲዒ ጊዲ ታማሮ። ¹² ታኒ ማጫሳይ ታማርሳና ሜላ ዎይኮ አዴ ቦሳ አዋታና ሜላ ጊዶናሺን ሲዒ ጊዲ ዳና ሜላ ኮያይስ። ¹³ አዳሜይ ኮይሮ ሜዴቲስ፤ ጉዩፔ ሄዋና ሜዴታሱ። ¹⁴ ቃሲ ጨሜታዳ ያሳ ሂጊያ ሜንሲዳይ ማጫሲፔ አቲን አዳማ ጊዴና። ¹⁵ ሺን ማጫሲ አማኖን፣ ሲቆኒኔ ጌሻቴሳን ባንታና ሃሪዲ ዴዒኮ * ናይታ ዩሎን አታና።

3

ዎሳ ኬላ ጨማታ

2:7 2ዓለ 1:11 2:9 1ጳዒ 3:3 2:13 ሜዴ 2:7፣ 21-22 2:14 ሜዴ 3:1-6 * 2:15 ባንታና ሃሪዲ ዴዒኮ፣ ዎይኮ ኢያ ዩሊዳ ናይቲ አማኖን፣ ሲቆኒኔ ጌሻቴሳን ባንታና ሃሪዲ ዴዒኮ።

1 አኒካ፥ «ዎሳ ኬሲ ካሌሲያ አሲ ጊዳናው ኮይኮ ሎዎባ አሞቴስ» ጊያ አዳይ ቱማ። 2 ዎሳ ኬሳ ካሌሲያ አሲ ቦሬቶናይሳ፥ ኢሲ ማቺ ፃላሊ ዴዔይሳ፥ ማራን ዴዔይሳ፥ ባና ሃሬይሳ፥ ቤሴይሳዳ አሴይሳ፥ ኢማሴ ሞኬይሳ፥ ታማርሳናው ዳንዳዔይሳ፥ 3 ማሶቶናይሳ፥ አዬቶናይሳ፥ ፓላሞናይሳ፥ ሚሼ ሲቆናይሳ፥ 4 ኢያ ናይቲ ኢያው ኪቴቴይሳኔ ቦንቼይሳ፥ ባ ኬሳ አይሳናው ዳንዳዔይሳ ጊዳናው ቤሴስ። 5 ኢሲ አሲ ባ ኬሳ አይሳናው ዳንዳዎና ኢዲኮ፥ ዎሳ ዎሳ ኬሲ ዋቲ አይሳናው ዳንዳዒ? 6 አቶርን ሱጌቲዲ፥ ፃላሄይ ዎሳ ፒርዳን ኩንዲዳይሳዳ ኩንዶና ሜላ፥ አራሲ አማኒዳ አሲ ጊዳናው ቤሴና። 7 ቦሬኒኔ ፃላሄ ሂሄን ጌሎና ሜላ ሄ ኡራይ አማኖና አሳ ማታን ናሼቴይሳ ጊዳናው ቤሴስ።

ዎሳ ኬሳ ዳቆኔታ

8 ሄሳዳ ቃሲ ዎሳ ኬሳ ዳቆኔቲ ቦንቼቲዳይሳታ፥ ናምዑ ዶና አዴቶናይሳታ፥ ዳሮ ዎይኔ ኡሻ ኡቶናይሳታ፥ ሚሼ ያሬቶናይሳታ፥ 9 አማኑዋ ፀራ ጌሻ ካሃን ናጊይሳታ ጊዳናው ቤሴስ። 10 ኤንቲ ኮይሮቲዲ ፓጩታናው ኮሼስ፤ ኤንታ ቦላ ቦሬይ ባይና ኢዲኮ፥ ዎሳ ኬሳ ዳቆኔ ጊዲዲ አሶ። 11 ሄሳዳካ፥ ኤንታ ማጫሳቲ ቦንቼቲዳይሳታ፥ ዚጊሮናይሳታ፥ ማራን ዴዔይሳታ፥ ኡባባን አማኔቴይሳታ ጊዳናው ቤሴስ። 12 ዎሳ ኬሳ ዳቆኔቲ ኢሲ ማቺ ፃላሊ ዴዔይሳ ጊዶ። ባ ናይታኔ ባ ኬሳ ሎይሲ አይሴይሳ ጊዳናው ቤሴስ። 13 ዎሳ ኬሳ ዳቆኔ ጊዲዲ፥ ሎዎ አሶ አሴይሳቲ፥ ኤንታው ጊታ ቦንቾ ቃሲ ኪሪስቶስ ዩሱሳን ባንታው ዴዒያ አማኑዋባ አዳናው ዳሮ ሚኖቴሲ ዴማና።

ጊታ ፀራ

14 ታኒ ሃ ኪታ ኔው ፃፋሼ፥ ኤሌሳዳ ኔኮ ባና ጋዳ ኡፋይሲ ዎሳይስ። 15 ሺን ታኒ ቦና ጋምዒኮ፥ ዎሳ ኬሳን አሳይ ዋኒዲ ዳናው ቤሲያኮ ኤራና ሜላ ሃይሳ ኔው ፃፋይስ። ዴዎ ዎሳ ኬሳይ ቱማቴሳስ ቱሲኔ ባሶ። 16 ኑ አማኑዋ ፀራይ ሲዴይ ባይና ጊታ። ኪሪስቶሲ አሾ ማዒዲ ቆንጨስ፤ ኢያ ቱማቴሳ ጌሻ አያናይ ማርካቲስ። ኪታንቾታስ ቤንቲስ፤ ኢ ካዎቴሳ ኡባስ ሳባኬቲስ። አላሜን ዴዒያ አሳን አማኔቲስ፤ ቦንቾን ሳሎ ኤኬቲስ።

4

ዎርዶ አስታማሪታ

1 ያና ዎዲያን ባሌሲያ አያናታኔ ቱና አያናታ ቲሚርቲያ ካሊዲ፣ ኢሲ ኢሲ አሳይ አማኑዋ ካዳናይሳ ጌሻ አያናይ ቆንጨሲዲ አዲስ። 2 ሄሳ ሜላ ቲሚርቲይ ኤንታ ካሃይ ዶጨን፣ አሳ ባሌሲያ ዎርዳንቾ አስታማሪታፔ ዩስ።

3 ሄሳ ሜላ አሳቲ ኤኮኔ ጌሎ ቃሲ ኢሲ ካሳታ ሞና ሜላ ዲጎሶና። ሺን አማኔይሳቲኔ ቱማ ኤሬይሳቲ ያሳ ጋላቲ ዎሲዲ ማና ሜላ ያሳይ ካሲ ሜዲስ። 4 ያሳይ ሜዲዳ ኡባባይ ሎዎ። ያሳ ጋላቲዲ ሚኮ ዎራ ዎዲያባይ አይቢካ ባዋ። 5 ኡባባይ ያሳ ቃላኒኔ ዎሳን ጌሺ ጊዴስ።

ኪሪስቶስ አማኔቲዳ አይሌ ጊዶ

6 ሄሳ ጊሾ፣ ኔኒ ሃ ቲሚርቲያ አማኔይሳታ ታማርሲኮ፣ ኑ አማኑዋኒኔ ሎዎ ቲሚርቲያ ኪቴታዳ ዲጨዳ ኪሪስቶስ ዩሱሳ ሎዎ አይሌ ጊዳና። 7 ሺን ጎዲ ባይና ቱማ ጊዶና አዳፔኔ ጨማ ማጫሳ ሃይሲያፔ ባቃታ። ቱማ አያና ዴዎን ዳናው ኔና ሎሂሳ። 8 አሲ ባ አሳቲሳ ሚንሳናው አሲያ አሶይ ጉሲ ማዴስ። ሺን ቱማ አያና ዴዎን ባና ሎሂሶይ ሃዲካ ሜሪናውካ ዴዎ ኢሚያ ኡፋይሲ ዴዲያ ጊሾ ኡባስ ማዴስ። 9 ሃ ቃላይ አሳ ኡባይ ኤካናው ቤሲያ ቱማ አዳ። 10 ኑኒ አሳ ኡባ፣ ኡባሬ አሲዲ አማኔይሳታ አሺያ ዴዎ ያሳሬ ኤካና ጊዲ ኡፋይሳን ናጊያ ጊሾ፣ ሄሳስ ኑኒ አሶን ዳቡሮሲኔ ባዴቶስ።

11 ሃይሳ ኪታኔ ታማርሳ። 12 ኔኒ ያላጋ ጊዲያ ጊሾ ኔና አኒካ ካዶፓ። ሺን አማኔይሳታስ ኔኒ አዳን፣ አሶን፣ ሲቆን፣ አማኖኒኔ ጌሻቴሳን ሌሚሶ ጊዳ። 13 ታኒ ያና ጋካናው አሳስ ጌሻ ማፃፋ ናባቦን፣ ሳባኮኒኔ ታማርሶን ሚና። 14 ቲንቢቴይ አዴቲን፣ ጨማቲ ባንታ ኩሺያ ኔ ቦላ ዎሲዳ ዎዴ ኔኒ ኤኪዳ፣ ኔናን ዴዲያ ጌሻ አያና ኢሞታ ካዶፓ።

15 ኔ ዲቻይ አሳ ኡባስ ቆንጫና ሜላ ሄሳ ሚንሳ ቆፓ፤ ሃይሳ ኡባ ዎዴ አሳ። 16 ኔ ሁዲያሲኔ ኔ ቲሚርቲያስ ናጌታ። ኔኒ ሄሳ ኡባ ዎዴ አሲኮ ኔናኔ ኔና ሲዔይሳታ አሻሳ።

5

አምዔታባ

1 ጨማ አዴታ ኔ አዋዳ ቦንቻሬ አቲን ሃንቁቶፋ። ያላጋ አዴታ ኔ ኢሻዳ አሳዳ ዌላ። 2 ጨማ ማጫሳታ ኔ አደዳ፣ ያላጋ ማጫሳታ ኔ ሚቺዳ፣ ፖሎ ጌሻቴሳን አይካ።

3 አዘኒ ሃይቂዳ ቱማ አምዔታ ቦንቻ። 4 ሺን አምዔስ ናይቲ ዎይኮ ናይታ ናይቲ ዴዒኮ፤ ሄ ናይቲ ቱማ አያና ዴዎን ዴዔይሳ ቤሳናው ባንታና ዩሊዳይሳታኔ፤ ባንታ ዎጋ አዩዉኔ ዎጋ አዋ ማዲዲ ኩሼ ዛሮ ታማሮ። ሄሲ ያሳ ኡፋይሲያባ።

5 ባርካ ዴዒያ ቱማ አምዒያ ያሳፌ ማዴ ዴማናው ኡፋይሳን ናጋሱ። ጋላሲኔ ቃማ ያሳይ ባና ማዳና ሜላ ዎሳዉሱኔ አይቻዉሱ።

6 ሺን ሃ አላሚያን ሎዎ ዱሳ ሃላላ ኮያ አምዒያ ጋፃ ዴዓሼ ሃይቂዳሮ። 7 አኒካ ኤንታ ቦሮና ሜላ ሃ ኪታ ኤንታው ኢማ።

8 ሺን ባ ዳቦታስ፤ ኡባፌ አሲዲ ባ ሶ አሳስ ቆፖና አኒካ ባ አማኑዋ ካዲዳይሳ፤ አማኖና አሳፔካ አዲዳ ኢታ።

9 ላይሲ ኡሱፑን ታው ኩሚቦና አምዔ ሱንሳ ማዝጋባን ሃፎፓ። ቃሲ ሄሳ ቦላ ኢያ ባ አዘናስ አማኔቲዳሮ ጊዳናው ኮሼስ።

10 ናይታ ዲሾን፤ ኢማሴ ሞኮን፤ ጊሻታ ቶሁዋ ሜቻን፤ ሜቶቲያ አሳ ማዴን፤ ሎዎ አሶ ኡባስ ባና አሳ ኢሚዳሮኔ ሎዎ አሶን ኤሬቲዳሮ ጊዳናው ቤሴስ።

11 ሺን ያላጋ አምዔታ ሱንሳ ማዝጋባን ሃፎፓ። ኤንታና አዘና ጌሎ ጌሎ ጊያ አሾ አምይ አይኪያ ዎዴ ኪሪስቶሳ አጋና። 12 ኤንቲ ኮይሮ ጌሊዳ ቃላ ሜንሲዳ ጊሾ ፐርዴታና። 13 ሄሳ ቦላ ኤንቲ አሶ ዳዩዲ ኪሳፌ ኪሴ ዩያና። ዩሻ ሃላላ ጊዶናሺን ዚጊርሳኒኔ ባንታና ጋሶናባን ጌሊዲ ቤሶናባ አዴቶሶና። 14 ሄሳ ጊሾ፤ ኑ ሞርኬቲ ኑ ቦላ አዴቲያ ኢታባ ዴሞና ሜላ ያላጋ አምዔቲ አዘና ጌሊዲ፤ ናዓ ዩሊዲ፤ ባንታ ኬሳ አይሳና ሜላ ዙራይስ። 15 ሃይሳፌ ካሴ ጉሳ አምዔቲ ሃላሄ ካላናው ጉዩ ሲሚዶሶና።

16 ኢሲ አማኒያ ማጫሴስ ሶ አሳ ጊዶን አምዔቲ ዴዒኮ ኢያ ኤንታ ማዳናው ቤሴስ። ሄሳዳ አሲኮ፤ ዎሳ ኬሳስ ቶሆይ ካዉዩስ። ሄ ዎዴ ዎሳ ኬሳይ ማዴ ቤሲያ ቱማ አምዔታ ማዳናው ዳንዳዔስ።

17 ዎሳ ኬሲ ሎይሲ ሄሚያ ጨማቲ፤ ኡባፌ አሲዲ፤ ቃላ ሳባኮኒኔ ታማርሶን ዳቡሬይሳቲ ዳኮ ቦንቾ ኤካናው ቤሴስ። 18 ጊሻ ማፃይ፤ «ዉዱማን ካሳ ዩዲያ ቦራ ዶና ቃቾፋ» ሄሳዳካ፤ «አሳንቾይ ባ ዳሞዚያ ኤካናው ቤሴስ» ያጌስ።

19 ናምዑ ዎይኮ ሄቩ ማርኪ ባይና፤ ዎሳ ኬሳ ጨማ ሞቲያባ ሲዎፓ። 20 ሃራቲ ያያና ሜላ ናጋራ አሲያ እናካ አሳ ኡባ ሲንሳን ሃንቁታ።

21 ኒኒ አሳ ሶምዎ ቤዎና፤ ኢሱዋ ኢሱዋፌ ዱማዮና ሃ ኪታ ናጋና ሜላ ያሳ፤ ጎዳ ዩሱስ ኪሪስቶሳኔ ዶሬቲዳ ኪታንቾታ ሲንሳን ታ ኔና ዙራይስ። 22 አዴ ቦላካ ኔ ኩሺያ ዎሳዳ ሹማናው ኤሌሶፓ። ሃራታ ናጋራን ጌሎፓ፤ ኔና ጊሻቲሳን ናጋ።

23 ነኒ ኡባ ዎዴ ሃርጌቲያ ጊሾኔ ኔ ኡሎ ሃርጊያ ጊሾ ሃሳ 9ላላ ኡዮፓ፤ ጉሳ ዎይኔ ኡያ።

24 ኢሲ ኢሲ አሳታ ናጋራይ ቆንጩ፤ ኤንታ ናጋራይ ኤንታ ፐርዳናው ኤንታፌ ሲንፅ አደስ፤ ሺን ሃራታ ናጋራይ ጉዩፔ ጋምዲዲ ቆንጩስ። 25 ሄሳዳ፤ ሎዎ አሶይካ ቆንጩ፤ ቆንጮና ኢዊኮካ ጌማናው ዳንዳዔና።

6

አይሌታስ ኢሜቲዳ ዞሬ

1 ያሳ ሱንሳይኔ ኑ ቲሚርቴይ ጫዬቶና ሜላ አይሌቴሳን ዴዔይሳቲ ባንታና ሃሪያ ጎዳታ ቦንቾ። 2 አማኒያ ጎዳቲ ዴዒያ አይሌቲ፤ ኤንታ ጎዳቲ ኤንታው ኢሻ ጊዲያ ጊሾ ኤንታ ካዶፓ። ኤንታ አሱዋን ማዴቲያ ጎዳቲ፤ አማኔይሳታኔ ዶሴቲዳይሳታ ጊዲያ ጊሾ ኤንቲ ካሴይሳፌ አሲዲ አሳናው ቤሴስ።

ዎርዶ ቲሚርቴያኔ ቱማ ዱሬቴሳ

ነኒ ሃይሳ ታማርሳናውኔ ኤንቲ አሳና ሜላ ዞራናው ቤሴስ። 3 አኒካ ዱማ ቲሚርቴያ ታማርሲያባ ጊዲኮ፤ ኑ ጎዳ ዩሱስ ኪሪስቶሳ ቱማ ቃላራኔ ኑ አማኑዋ ቲሚርቴያራ ጋሄቴና። 4 ሄ ኡራይ አቶሮን ሱጌቴሴፔ አቲን አይኮካ ኤሬና። ኤንታው ኢሲ ቆፋ ቦላ ፓላማናውኔ አዩታናው ኢታ አሞይ ዴዔስ። ሄሲ ቃናቴ፤ አሺ፤ ጫሼ፤ ኢታ ሲደኔ፤ 5 ጊንና ፓላማ ካሌሴስ። ቃሲ ኤንታው ኢታ ዎዛኒ ዴዔስ፤ ቱማካ ባሊዶሶና፤ ኤንቲ ያሳ አማኖይ ዱሬቴሳስ አጌ ጊዲ ቆፖሶና።

6 ሺን ታው ዴዒያባይ ጊዳና ጊያ አሳስ ቱማ አያና ዴዎይ ጊታ ዎደ። 7 ኑኒ ሃ አላሚያ አይኮካ ኤሂቦኮ፤ ቃሲ ኢያፔ አይኮካ ኤኪዲ ቦኮ። 8 ኑስ ካሴኔ ማዎይ ዴዒኮ ሄሲ ጊዳና። 9 ሺን ዱሬቴሳ ኮዩይሳቲ ፓጩኒኔ ዊሄን ጌሎሶና። ቃሲ ኤንታና ዱጌ ዳፊያኔ ዳይሲያ ኤያቴሴኔ ቆሂያ አሞን ኩንዶሶና። 10 ሚሼ ሲቆይ ኢታቴሳ ኡባስ ፕልቶ። ኢሶቲ ኢሶቲ ሚሼ አሞቴሼ አማኖፔ ባሌቲዲ ዳሮ ሜቶን ባንታና ዩጊዶሶና።

ዊሞቲዮሳስ ኢሜቲዳ ዞሬኔ ኪታ

11 ሺን ኔኖ፤ ያሳ አሶ፤ ሄሳፌ ባቃታ። ዊሎቴሳ፤ ያሳ ዳኖ፤ አማኖ፤ ሲቆ፤ ዳንዳዳኔ አሽኬቴሳ ካላ። 12 አማኖ ባዊያ ሎይሳ ባዌታ። ዳሮ አሳ ሲንሳን ኔ ማርካቲዳ ኔ አማኑዋባ፤ ያሳይ ኔና ኢያው ዌጊዳ ሜሪና ዴዑዋ አይካ። 13 ኡባስ ዴዎ ኢሚያ ያሳ ሲንሳኒኔ፤ ጴንዌ ጲላዎሳ ሲንሳን ሎዎ ማርካ ማርካቲዳ ኪሪስቶስ

ዮሱሳ ሲንሳን ታ ኔና ኪታይስ። ¹⁴ ኑ ጎዳ ዮሱስ ኪሪስቶስ ቆንጫና ጋካናው ሃ ኪታ ባሊኔ ቦሬይ ባይና ናጋ። ¹⁵ ባ ሃላላ ኡባ ሃሪያ ቦንቾ ያሳይ፣ ካዎታ ካዎይ፣ ጎዳታ ጎዳይ፣ ባ ቆፒዳ ቃማን ዮሱስ ኪሪስቶሳ ዛሪ ኪታና። ¹⁶ ኢሲ ኢያ ሃላሊ ሃይቁና። እኒካ ሺቃናው ዳንዳዎና ፖፖን ዴዔስ። እኒካ ኢያ ቤዲቤና፣ ቃሲ ቤዓናውካ ዳንዳዔና። ቦንቾይኔ ሜሪና ዎልቃይ ኢያው ጊዶ። አሚን።

¹⁷ ሃ አላሚያ ዱሬቲ ጮ ዳያ ሻሎን አቶርቶና ሜላኔ ጨቆና ሜላ አዳ። ኑስ ኮሺያባ ፓላሂሲዲ ኢሚያ ኑና አንጂያ፣ ዱሬ ያሳን አማኔታና ሜላ ኤንታ ኪታ። ¹⁸ ኤንቲ ሎዎ አሶ አሳናዳ ሎዎ አሶን ዱሬታናዳ፣ ኬሃታኔ ሃራታስ ሻኬይሳታ ጊዳና ሜላ ኪታ። ¹⁹ ሄሲ ኤንታው ሲንሳስ ሚኖ ባሶ ጊዲያ ጊሾ ሄ ዎዴ ኤንቲ ቱማ ዴዎይ አይ ዳኒያኮ ኤራና።

²⁰ ዒሞቲዮሳ፣ ኢሲ ኢሲ አሳይ፣ «ኤራቴሲ» ጊያ ኤያ ፓላማቴኔ ሃዳ አዳፕ ባቃታ፤ ኔው ኢሜቲዳ ሃዳራ ናጋ። ²¹ ኢሶቲ ኢሶቲ ኑስ ኤራቴሲ ዴዔስ ያጊሼ አማኑዋ አጊዶሶና። ያሳ አዶ ኬሃቴሳይ ሂንቴ ኡባራ ጊዶ።

አራሳ ጫቁዋ ጎፋሉ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 12 Mar 2019 from source files dated 12
Mar 2019
c35d6c73-3843-5482-b53e-7559d35deee5